

Ai 10 del 10 del 2010

Gropes, autoritèdes e jent à tout pèrt a la Festa del Rengraziament per la recostituzion del Comun General



L'autoritèdes Gilmozzi, Ploner, Bernard, Donei e Dellagiacom a la Festa del Rengraziament. (Fotos: Ivano Winterle)

Fascia - L'Union di Ladins de Fascia, la Musega da Vich, l'autoritèdes locales, provinzièles e interladines, i Studafech, la Musega da Moena, i Cor Valfassa, i Volontadives del lengaz, i Cor Enrosadira, i Alpini, i Fascia Balon e l'Atletica Fassa 08, i Socors da mont, la Crousc Checena, i confalons di Comuns e de la Parochies de Fascia, l'ADVSP de la valèdes de la Veisc, i Schützen de Fascia, la Musega Auta Fascia, i Grop Folk de Cianacei, i Schuhplattler de Ciampedel, la Musega da Poza e i Grop de Folclor da Soraga. L'era chisc che se à podù veder passèr fora per la strèdes de Poza la seconda domenica de otober, per la festa del Rengraziament, chest an, festa per la recostituzion per i Comun General de Fascia.

Per n muie de jent chela passèda l'è stat na domenica desche n'otra, na di de soreie desche n'otra. No l'è dassen mudà nia per n muie, ma per chi che enveze à tout pèrt a la festa del Rengraziament fosc zeche l'è mudà, fosc mingol più che i etres se à podù se sentir pèrt de na gran comunanza, fata sci de empegnes, ma ence de momenc lijieres e festa. Ge vardan a la defilèda chi èl che

no aessa volù esser ite per anter? A chi èl che no ge à endespijù de no se aer trat ite l'quant o l'camejot per se sentir amò più de festa? Chela veia usanza de se binèr per rengrazièr i Segnoredie per i bens che la tera aea dat via per l'istà, anchecondi podessa esser veduda desche na usanza trop veia e pech utola. Ma fosc l'pensier che se à fat chi che à semper endrezà e che amò ades endrezza chesta emportanta festa l'è stat chel proèr amò n'outa a viver endò chi momenc del passà olache se podea se fermèr per na di e no pissèr demò a se enstesc, fèr na picola reflescion en cont de chel che la tera e i ciel ne à conzedù via per l'an, e ence n pensier su nosc davegnir.

Chest an l'è stat pissà apontin de se emprevaler de chesta festa tradizionèla del Rengraziament per festejèr la naa del Comun General. Chela de domenica ai 10 del 10 del 2010 l'è stat proprio la naa spirituèla de chest nef ent, che à volù te chesta ocazion aer ence l sostegn de duta sia jent, de duc nos che sion i vero Comun General.

Da man del volontariat se à vedù, descheche aede podù lejer da la

lista, dassen n muie de gropes, ma ence n muie de componenc. N'outa rué te tendon nia de più bel che l'Inn Ladin sonà da duc i sonadores de la Museghes de val à emozionà duc i prejenc. E sun paladina Gabriele Valentini e Magda Lorenz, regolé col quant de so paisc, per dut l temp i à viventà i momenc de la festa, prejentan autoritèdes e gropes. L prum a rejonèr l'è stat i patron de cèsa, l'ombolt de Poza Tullio Dellagiacom, che à recordà ence i alpini vengui a mènchèr te l'Afghanistan. Curc descorsc ma de gran sentiment e fon significat è stac fac da la Procuradora Cristina Donei, dal President del Consei General Cesare Bernard, dal President de l'Union di Ladins de Fascia Silvano Ploner e dal raprezentant per la provinza de Trent, l'assessor Mauro Gilmozzi. Dò na bona marena la festa è jita inant con ciacolèdes anter la jent, grignèdes, musega e divertiment, sibie sora desche che fora da tendon. L'è stat bel a la festa del Rengraziament! Musega, bai, gaissa, voa de fèr e ence momenc emportanc e de gran significhat che ne à fat pajier i scutèr duc ensem! (vr)

Trei obietives per i Comun General

L'intervent portà dant da la Procuradora del Comun General de Fascia, Cristina Donei

Dò de la pruma sentada di 14 de messal, canche en piena sajón no se podea ge dar a chest nef Comun General de Fascia na giusta festa, aon pissà che fosse delvers ge dedicar fora per l'uton na giornada, e columna di èl la miora che la Festa del Rengraziament?

Se troar te geja, ge dar chel spirit de religiosità e domanar ence la benediscion soravia chest nef ent che ne deide a lurar duc dessema per i ben comun de duta noscia jent.

Chest an la croda proprio ai 10 de otober e donca l'è i 10 del 10 del 2010. Ence i numeres donca ne deida a sperar che chesta simbologia la fosse de bon augurie, e speron de se vadagnar n 10 col sforz che podaron far. Develpai a l'Union di Ladins che ne à dat l'èrga te la di del Rengraziament che l'è ence chela istituzion che à portà inant noscia identità tel temp, te tempes olache esser ladins no l'era sori.

N pensier ence a chi che no l'è più con noi e che tant à dat a la cauja ladina. Con so antevèder, ostinazion e orgolie i à sapù portar inant noscia identità e noi anché binon sù i fruc.

Noscia identità la è desche na crigna olache l'è ite cultura, lengaz, istoria, tradizion, arpejon, reisc e cognon star ascord de no se perder nia. Perder demò un de chisc

componenc pel minar noscia autonomia. Ades aon duc i strumenc per se rejer enstesc e de chest cognon ge recognoscer a la Provinzia de Trent e a nosc president Lorenzo Dellai de ne esser stac apede tel ge dar emportanza a chesta noscia identità de mendranza.

Aon tacà via delvers con i Comun General e ence i fat che aon jà lità ne dasc la gaissa de lurar delvers. Saede che con Fiem e Primier sion le prume comunità a pontar via e donca esser chi che verc i troi e al medemo temp sot l'eie de dut i Trentin ne dasc maor responsabilità de jir inant delvers e con ferstont.

Se aon metù dant 3 obietives che vardaron de portar inant te chisc 5 egn. De segur te chisc egn che aon tedant luraron duc ensem per miorar e meter a una i servies te na otica de sparagn e efizienza, ma no demò, cognaron ence pissar a coche volaron noscia val tel davegnir e donca n livel più aut, ma soraldut podaron se dir comunità demò canche luraron dessema, responsaboi de noscia identità.

Vigni comunità arà desche obietif no demò chel amministratif aldò de la lege, ma soraldut crear na coejon forta, gaerta e ge far entener a duta la jent de esser i veri protagonis del Comun General de Fascia.



Develpai de cher

L Comun General de Fascia e l'Union di Ladins vel ge sporjer n gran e fort develpai de cher a l'autoritèdes, ai gropes, ai

volontadives, a la jent, a duc chi che à didà de ogne vers a endrezèr la Festa del Rengraziament, e a duc chi che à tout pèrt.

"Anché, noi, duc adum, sion i Comun General de Fascia"

L'intervent portà dant dal President del Consei General, Cesare Bernard

Canche l'è stat pissà e donca proponet chesta festa, me é de fata vengù tel ciáf i placiti, le riunion de Pien Comun, dit ence Comun General, che binaa ensem duc i capofamilia de Fascia enlongia la Pief de Sèn Jan per tor dezijion per duta la comunanza.

No ve scone che l'ambizion l'era chesta. Binar a una endò la jent de Fascia per n momenc de rengraziament, de festa, ma ence de reflescion sun noscia identità e sun nosc davegnir.

Ti documenc de noscia istoria per Comun General no se enten tant na istituzion, ma l'è i momenc e i post olache i fascegn se bina ensem per rejonar e dezider del

davegnir.

Me fide a dir che anché, noi, duc adum, sion i Comun General de Fascia.

Ben segur aon lità na Procuradora, l'è n Consei di ombolc e n Consei general feruscol e engaisà che i à jà moet i prumes pasc per rejonar entorn a costion emportante. Sion dò che meton jù le linee de program che portarà Fascia envers so davegnir.

Te chest momenc crese che sie più che ütöl, se no indispensabol, che ogne sentadin de Fascia l troe l met, la motivazion per dir e dar so contribut. Pissar e rejonar dintorn a le costion no l'è temp trat demez ma l'è fundament de scelte spartide

che dessegnerà la val che ge lasciaron a nesc Fies.

Te chest momenc de scomenz gio ge domane a la jent de Fascia de soscedar n fon spirit de partezipazion, de democrazia, de colaborazion. A la jent de Fascia ge domane de cognoscer i Conseieres del Consei General e de jir a i scinternar, no per reclamar o dir jù, ma per dar proponete e meter dant i besognes de duta noscia val.

No encrojar i brac a veder che che fasc i Comun General, ma durar duc i strumenc de na comunanza ascorta desche Fascia per na crescimonìa che sie de dut e de duc.

Scrìver neve plate de storia, dessegner l davegnir de una val l'è

na certa responsabilità, ma porta ence gaissa, estro de far proponete e portar idee. Pel doventar trist e senester se tu te oute e no l'è nesciugn.

Me vegn tel ciáf n ejempie che tole da la Catalunya, comunanza leada a la noscia da desvalives versc. I Castells, chele "piramidi umane" che i fasc i momenc de festa. Sionsom l'è demò dotrei persone che se poja sun autre sotite coscita ju e ju fin junsom olache dut l'è tegnù sù da n grumon de persone che dasc so didament. Coscita gio veide i Comun General: na val che tegnam adum per ruar ai obietives più auc. Cognassade la veder, chesta jent che se strenc e se deida l'una

co l'aura.

Se noi volon venjer chesta partida e ruar auc, cognon rencurar n muie i leames: anter nos, dant de dut, con noscia istoria e noscia cultura, con noscia tera.

Ge vel meter dalbon en doura chi valores de solidarietà, de vejinanza un co l'auter che noscia jent à semper palesà. La festa del rengraziament la vegn da chisc valores.

Rengrazion Chi che ne à dat dut chel che aon e vardon de l portar inant e de l miorar. Chest l'è chel che ne domana anché nesc fies e i fascegn de doman.

Dievelpae e che l varde via nesc varesc.